

曰 殿下以聰明仁聖新服大命舉事立政欲出於正而 大妃在上導以非義使吾君有此過舉則不義之名歸於 大妃於 殿下之心安乎父母有過則諫諫而不從號泣而隨之古人事親之道如是 殿下教曰非我好佛出於 慈旨是 殿下亦知好佛之爲非也而當初大妃之有此旨既不能諫止今又必欲成之以至不顧利害不恤人言甘蹈拒諫自用之轍是 殿下事親之孝爲國之道兩失之矣況自殿下即位之後天變累作冬暖如春雷發不時太白晝見夜有赤氣此正 殿下修省恐懼臨深履薄之時也反爲此違道悖理之舉牢拒衆論是 殿下非徒失臣民之望其慢忽天戒深矣臣等不勝寒心臣等受暇于外不預朝務然事關重大不容自嘿敢冒天威伏願 殿下決從群議不允○傳于政院曰讀書堂劄子云夜有赤氣信有是乎回啓曰臣等亦聞前月晦日夜乾方有赤氣如火光南方雲淡色黃又聞是日山火偶發於高嶺鐘山等處連燒數里疑是此火之光也史臣曰人君所畏者天變也古人有以四方災異常警告於君者居喉舌之地而以天乙示變歸之於山火之光非但使疏辭不實又啓人君慢忽變異之心其殆於諛乎○丁亥左議政朴元宗右議政柳順汀吏曹判書成